

Rapport dil president

La suprastonza ei serimnada 4 gadas igl onn vargau.

2 gadas essen sentupai e 2 gadas havein nus fatg sesidas per telefon.

Demai che corona ei stada omnipresenta dapi il mars 2020 han beinenqual activitads da nies club buca saviu ver liug, aschia che nus havein buca saviu far nies lotto, il qual che fuss da gronda impurtonza per nies club.

Medemamein havein nus buca saviu menar atras il turnier da divertiment muort corona.

Il Cup Crestas ed il Cup Punteglias havein nus perpletg saviu menar atras cun fetg bien success.

Duront la stad havein nus era puspei priu part al Cup Grischun dils clubs ,giugau han uonn la Karin Demont, la Ricarda Tuor, la Carmen Bearth, il Gion Petschen ed igl Erich Decurtins. Sco gia ils onns vargai vein era uonn giu bien success e vegni el miez final, nua che nus havein spiars 2–1 encunter Vazsut, il victur dil Cup Grischun 2020.

Sper ver intressantas partidas eisi era bi da star empau da cumpignia e tgirar vegls e novs contacts ed aschia era carmelar entgins giugadurs a nos turniers.

Demai ch'igl Interclub ei vegnius stuschaus dil matg sin la fin d'uost e settember havein nus dessistiu da far il turnier dil club. La suprastonza ei stada dil meini che esser ligiai duront 6 fin d'jamnas ina suenter l'otra seigi memia bia.

Mirau anavos eis ei stau empau in onn cun bia malsegirtad nua ch'ins ha saviu planisar pauc, aschia che enqual activitad han muncau, per exempel il trer rudialas ni ir sin pista.

Mo pli da patertgar dat a mi che nus havein puspei buca saviu menar atras nies lotto, lein sperar ch'ei seigi pusseivel da far proxim atun nies lotto.

Dallas finanzas havein nus giu bien quittau igl onn vargau. Grazia al sustegn finanziel dil cantun, per menar atras turniers, sco era in sustegn finanziel pervia da COVID-19 vesa il quen ora buc aschi mal.

Secapescha ch'ils daners dil lotto mauncan, ultra da quei havein nus aunc schau far ils plaz igl onn vargau la firma Joseph, quei che ha era custau frs. 5'000.- dapli che da far sez ils plazs, persuenter havein nus giu l'entira stad fetg buns plazs.

Per che quei stetti vinavon aschia, eis ei era impurtont che vus separticipeschies a nos turniers. Aschiditg che nus havein glieud avunda per menar atras ils turniers, savein nus era seprofitar da quei sustegn.

Per finir engraziel jeu a mes consuprastonts per la buna collaboraziun che nus havein giu, in grond engraziel admittel allas fatschentas che han ina reclama giu sil plaz da tennis.

Medemamein engraziel jeu alla Erna che ha bien quittau da nossa casa dil club, sco era al Leandro in engraziel per sia lavur sco cauplaz.

In engraziel era allas equipas d'Interclub per lur lavur ed a tut quels che han segidau sin ina ni l'otra moda duront igl onn vargau.

Trun, il mars 2021

il president

Decurtins Erich